

ALAHADY FAHA-3 KAREMY - TAONA - B



« *Ravao ity Tempoly ity, fa hatsangako indray amin'ny hateloana* » (Jo. 2: 19)

Ry Kristianina havana, amin'izao Alahady fahatelon'ny karemy izao dia mampiditra antsika tanteraka amin'ny fiomanana ny fankalazana ny Paka. Noho izany dia mampiroso antsika amin'ny Ady sy Dia izay mitondra antsika amin'ny Paka izay fandalovana (passage) satria

miala amin'ny ratsy miaraka amin'i Kristy isika ka miditra amin'ny fiainam-baovao miaraka aminy koa. Izy nandresy ny fahafatesana no hankalazaintsika amin'ny Paka.

Vakiteny I : Eks. 20, 1-17

Tononkira : Salamo 18

Vakiteny II : 1 Kôr. 1, 22-25

Evanjely : Jo. 2, 13-25

Manomboka izao Alahady fahatelo amin'ny karemy izao dia tantaran'i Jesoa mankany Jerosalema araky ny

evanjelin'i Md Joany no vakina amintsika satria arak'ireo mpandalina sy ny fomba nanoratan'i Md Joany ny evanjely dia io fiakaran'i Jesoa ao Jerosalema io no tandindon'ny fialantsika amin'ny fiainana mirefarera amin'ny tany ka miakatra amin'ny fiainam-baovao ao Jerosalema ilay tònana masina, tònanan'ny fiadanana. Io fidiran'i Jesoa ao Jerosalema io no itondran'i Jesoa antsika Izy izay mitondra amin'ny fahasambarana, fahasambarana, fiadanana. Tanteraka izany raha mitoetra ao amin'i Kristy isika sy itoerany koa. Izany no fampianarana lehibe misongadina amin'izao Alahady izao.

Ny Tempoly dia fantantsika fa ivon'ny fiainan'ireo jody satria sady trano fivavahana, fanaovana sorona, fankalazana ny fety sy ny fombam-pivavahana maro isan-karazany. Ny tempoly izany no "référéncie principale" amin'ny fiainany manontolo, ny tempoly no maha-izy azy no antom-pisian'ny Jody. Amin'ny evanjely androany raha i Jesoa miditra ao an-tempoly dia mametraka amin'ny toerany arak'izany voalaza izany. Ny Tempoly dia ilay tranon'ny Ray ary izy tsy iza io Tranon'ny Ray io fa Izy Kristy.

Raha isika àry miaraka Aminy dia isika ihany koa no zary tempoly. Ny ivom-piainantsika noho

izany dia ny tempoly izay tsy inona fa ny fontsika. Matetika averimberintsika fa indrindra amin'izao karemy izao aoka isika hanaiky ny fontsika hidiovin'Andriamanitra.

Ambaran'ity Evanjely ity ary fa « akaiky ny Pakan'ny Jody, ka niakatra tany Jerosalema i Jesoa. Ary hitany tao anatin'ny Tempoly ny mpivarotra omby aman'ondry sy voromahailala ary ny mpanakalo vola nipetraka tao, ka nanao kotopia tamin'ny tady madinika Izy, dia nandroaka azy rehetra mbamin'ny omby aman'ondry hiala amin'ny Tempoly ; nararany ny volan'ny mpanakalo vola, nazerany ny latabatra, ary hoy Izy tamin'izay nivaro-boromahailala : *“Esory eto ireto, fa aza ataonareo trano fivarotana ny tranon'ny Raiko”* » (Jo. 2: 14 – 16).

Nanadio ny tempoly i Jesoa, nanadio ireo encombrement rehetra, ireo varotra izay midika fikatsahana ny tombotsoan'ny tena, manambara ny fitiavan-tena, manambara corruption jiaby. Tsy hoe sanatria manaratsy ny varotra fa ny fomba hanatanterahana ny varotra no matetika tsy mety satria misy lainga sy fitapitaka. Izay no mahatonga an'i Jesoa nanadio ny Tempoly. Mampatsiaro ny intention de prièresn'I Papa tamin'ny volana février voa lasa vavaka miady amin'ny corruption amin'ny fahalovana rehetra

Amin'izao firosoantsika amin'ny Paka izao enga anie isika hanaiky mba

hodiovin'Andriamanitra ny fontsika ka esorintsika ireo “encombrement” isankarazany.

Toy izany koa ho an'ny mpivarotra rehetra mba hametraka ny fahamarinana sy ny rariny.

Tsy hoe hanapotika ny mpiavarotra tao an-tempoly i Jesoa fa hametraka tsara ny anjara toeran'ny Tempoly fonenan'Andriamanitra ary izany koa ny fontsika tsy potehana fa mila fanadiovana amin'izao karemy izao. Izany no irin'i Jesoa, izany ny fanirian'ny Eglizy amin'izao fanomanana ny paka izao mba hitoeran'Andriamanitra ny fontsika, sy itoeran'i Jesoa. Raha mitoetra ao am-pontsika i Jesoa dia miova ny fiainantsika. Handresy ireny lainga sy fitapitaka manapotika ny fifandraisantsika amin'Andriamanitra ary ny fifandraisana amin'ny zava-boahary aza. Raha diovintsika ny fontsika dia manjaka ny tena fitiavana marina ka izany ny fifandraisana mihavao sy manatsara ny fiainantsika isika satria ny fitiavana no mandrindra ny fifandraisantsika fa tsy ny fitiavan-tena na ny fitadiavana ny soa ho an'ny tena fa fitadiavana ny soa iombonana.

Ny vakiteny voalohany manamafy ny teny folo izay manambara fahendrena, ny lalan-kombana, manambara ny tena fiainana mitondra antsika amin'ny fiainana izany hoe ny fiombonana amin'Andriamanitra loharanom-pahasambarana. Ny didy folo no mahazatra antsika fa ny teny folo izay atao hoe décalogue natolotr'Andriamanitra ho antsika mba handavorary ny fiainantsika, hanadiovantsika ny fontsika ka hifanaraka amin'ny sitrak'Andriamanitra satria izany no mitondra antsika amin'ny fahasambarana satria mitoetra eo anivontsika Andriamanitra ka hamokatra ny fiainantsika. Izany ny dikan'ireo teny folo, toro-làlana mba hialantsika amin'ny encombrement dia ny fijangajangana, ny fangalarana, ny lainga, ny faniriana vadin'olona, ny faniriana fananan'olona, ireo no manapotika ny fiainantsika.

Ry Kristianaia havana, aoka arahintsika tokoa ireo teny folo amin'izao vanim-potoanan' ny karemy izao hiadivantsika amin'ny “encombrement” mandoto ny fiainantsika ka hiroso ny

diantsika miaraka amin'i Kristy na dia fantantsika fa tsy mora izany fiakarana any Jerosalema satria hiaraka hifantsika amin'i Kristy isika ary izany kosa anefa no hazahoantsika ny famonjena.

Aza matahotra isika, tohizo ny diantsika ka mahereza isika hiady amin'ny fakam-panahy. Raha miady amin'ny fahotana miaraka amin'i Kristy isika dia hiaraka hitsangana amin'i Kristy amin'ny Paka ka hamokatra ny fiainantsika tahaka ny fiainan'i Lucien Botovasoa izay niaraka nifantsika tamin'i Kristy ka izany no nahazoany fiadanana, tsy natahotra izy na nisy nanapaka ny lohany aza noho ny fitiavana sy ny fifikirana tamin'i Kristy.

Aoka isika hijoro vavolombelona amin'ireo manodidina antsika fa i Kristy no làlana sy fahamarinana ary fiainana, raha izy no mitoetra ao amintsika dia tsy hatahotra isika.

Manamafy izany i Md Paoly ao amin'ny vakiteny faharoa *"Ary izahay kosa mitory an'i Kristy voafantsika tamin'ny Hazofijaliana. Fanafintohinana amin'ny Jody izany, ary fahadalana amin'ny Jentily; fa i Kristy herin'Andriamanitra sy fahendren'Andriamanitra kosa amin'izay voaantso, na Jody na Jentily. Fa izay toa fahadalan'Andriamanitra dia hendry noho ny fahendren'ny olombelona, ary izay toa fahalemen'Andriamanitra, dia mahery noho ny herin'ny olombelona"*. Fahendrena ny làlam-pamonjena, fanafintohinana i Jesoa nofantsihana tamin'ny hazo fijaliana, tsy azo saintsainin'olombelona izany fa kosa famonjena ho an'izay mino amin'Andriamanitra. Izany no iainantsika amin'izao firosoana amin'ny paka izao.

Ry Jesoa Kristy ô, nanaiky ianao ho famonjena ho anay, nanaiky hitondra ny aretina sy ny rofinay rehetra ary nodiovinao ilay tempoly tranon'Andriamanitra ka diovy koa ny fonay hitoeranao. Raha ianao tokoa no mitoetra ao aminay dia hiadam-pinaritra ao aminao izahay.

Ry Jesoa Tomponay ô, enga anie ny fahefanao izay tsy mamoritra fa mitondra fiadanana no fahefana hijoroanay ho vavalombelona eo amin'ny manodidina anay. Ampianaro izahay hanitsy ny fiainanay araky ny teny folo nampianarin'Andriamanitra ny vahoakany ka amin'izay dia hiadam-pinaritra miaraka aminao izahay. Amen

Mompera Arseveka Mgr Benjamin Ramaroson